



MALAYSIA

PENYATA RASMI PARLIMEN

Parliamentary Debates

KAMAR KHAS

Special Chamber

**PARLIMEN KEEMPAT BELAS
PENGKAL KELIMA
MESYUARAT PERTAMA**

K A N D U N G A N

UCAPAN DI BAWAH USUL BERKENAAN PERKARA TADBIR KERAJAAN [P.M. 17]:

- **Kekurangan Bekalan Kit Ujian Kendiri
COVID-19 di Kota Kinabalu**
- *YB. Tuan Chan Foong Hin (Kota Kinabalu)* (Halaman 1)
- **Impak Pandemik COVID-19 Terhadap Kaum
India di Malaysia**
- *YB. Tuan Kesavan a/l Subramaniam (Sungai Siput)* (Halaman 2)

**MALAYSIA
KAMAR KHAS
PARLIMEN KEEMPAT BELAS
PENGKAL KELIMA
MESYUARAT PERTAMA
Selasa, 8 Mac 2022**

Mesyuarat dimulakan pada pukul 2.30 petang

DOA

*[Dato' Ramli bin Dato' Mohd Nor (Cameron Highlands)
mempengerusikan Mesyuarat]*

**UCAPAN DI BAWAH USUL
BERKENAAN PERKARA TADBIR KERAJAAN (P.M. 17)**

**Kekurangan Bekalan Kit Ujian Kendiri
COVID-19 di Kota Kinabalu**

2.34 ptg.

Tuan Chan Foong Hin [Kota Kinabalu]: Terima kasih Tuan Yang di-Pertua atas memberi peluang kepada saya untuk berucap dalam Kamar Khas ini. Tuan Yang di-Pertua, saya ingin membangkitkan isu berkenaan kekurangan kit ujian sendiri COVID-19 di Sabah selepas Tahun Baharu Cina. Pada 7 Februari 2022 yang lalu, Kerajaan Sabah mengakui terdapat kekurangan alat ujian sendiri COVID-19 di Kota Kinabalu apabila jumlah kes baharu melonjak melebihi 1,600 di seluruh negeri.

Dalam usaha mengelak pembelian panik, kerajaan negeri terpaksa memberi jaminan kepada rakyat Sabah bahawa bekalan kit ujian sendiri akan pulih tidak lama lagi dan memberi nasihat kepada rakyat supaya tidak melakukan pembelian panik. Menteri Pembangunan Masyarakat dan Kesejahteraan Rakyat Sabah, Datuk Shahelmy Yahya, berkata kekurangan itu berpunca daripada lonjakan permintaan yang mendadak berikutan peningkatan mendadak kluster sekolah di seluruh negeri.

Selain itu, saiz stok kecil juga diberikan sebagai alasan kekurangan kit ujian di beberapa farmasi. Menteri Kerajaan Tempatan dan Perumahan Sabah, Datuk Seri Masidi Manjun, yang juga jurucakap COVID-19 negeri, telah menulis *tweet*, dengan izin: *"Based on feedback, some pharmacies do experience shortage of test kit for COVID-19 as they don't keep big amount of stock for commercial reason."*

Ini merupakan isu yang serius. Tanpa kit ujian sendiri COVID-19, maka rakyat tidak dapat melakukan ujian dan tidak akan mengetahui bahawa dia positif atau tidak dan mungkin akan buta-buta menjangkiti orang lain secara tidak sengaja. Persoalan saya kepada kerajaan, apakah rancangan dan usaha-usaha kerajaan kini dalam memastikan bekalan kit ujian sendiri yang mencukupi di pasaran? Bukan sahaja harga siling yang perlu dikawal malah bekalan yang mencukupi di seluruh negara juga penting.

Rangkaian bekalan kit ujian sendiri harus diuruskan dengan baik tanpa mengorbankan kesihatan rakyat yang jauh dari Lembah Klang. Itu sahaja ucapan saya. Terima kasih Tuan Yang di-Pertua. Sekian, terima kasih.

2.36 ptg.

Timbalan Menteri Perdagangan Dalam Negeri dan Hal Ehwal Pengguna [Dato' Rosol bin Wahid]: Terima kasih Tuan Yang di-Pertua. Terima kasih Yang Berhormat Kota Kinabalu. Tuan Yang di-Pertua, *Assalamualaikum warahmatullahi wabarakatuh*. Untuk makluman Tuan Yang di-Pertua dan Yang Berhormat Kota Kinabalu, kita menyedari apa yang dibangkitkan oleh Yang Berhormat Kota Kinabalu sebentar tadi bahawa isu kekurangan stok bekalan kit ujian sendiri COVID-19 di Sabah.

Untuk makluman Ahli Yang Berhormat, bekalan kit ujian sendiri COVID-19 di Sabah buat masa ini adalah mencukupi dan pemantauan dilaksanakan secara harian –tiap-tiap hari kita pantau ke atas 42 premis yang menjual kit ujian sendiri COVID-19 di Kota Kinabalu tiada masalah. Tidak dapat dinafikan ada beberapa premis yang kehabisan stok lebih cepat kerana berada di kawasan padat, kawasan bandar dan harga jualan mungkin lebih rendah daripada premis-premis lain mengakibatkan stok ujian tersebut tiada di pasaran buat masa tertentu sahaja.

Sehingga kini, keberadaan kit ujian sendiri COVID-19 telah pulih selepas Tahun Baharu Cina baru-baru ini. Berdasarkan statistik, sebanyak 376 peruncit di Sabah telah diberikan kelulusan untuk menjual kit ujian sendiri COVID-19. Pembekalan kit ujian sendiri COVID-19 adalah mencukupi dan KPDNHEP Sabah sentiasa mengalu-alukan agar lebih banyak peruncit untuk tampil memohon dari MDA untuk menjual kit ujian sendiri COVID-19 ini.

Tuan Yang di-Pertua, KPDNHEP Sabah juga menasihatkan agar pembeli membuat pembelian mengikut keperluan dan mengelakkan pembelian panik. Baru-baru ini berlaku sebegini adalah kerana cuti Tahun Baharu Cina yang panjang, kemudian kes melonjak. Jadi melibatkan sedikit pembelian panik. Tindakan penguatkuasaan yang tegas juga akan diambil ke atas mana-mana pihak yang menjual kit ujian sendiri COVID-19 melebihi harga maksimum iaitu RM19.90 yang ditetapkan oleh kerajaan atau melakukan aktiviti menyorok bekalan memandangkan kit ujian sendiri COVID-19 telah diwartakan sebagai barang kawalan di bawah Akta Kawalan Bekalan 1961.

Maklumat tambahan Tuan Yang di-Pertua, sehingga kini, data yang ada pada kami iaitu stok terdapat 3,869,773 yang berada dalam *market* sekarang. Itu untuk tambahan. Satu lagi, kita juga merasa bertuah kerana kita mempunyai lapan syarikat pengeluar kit ujian sendiri COVID-19 di negara kita. Terima kasih, Tuan Yang di-Pertua.

Impak Pandemik COVID-19 Terhadap Kaum India di Malaysia

2.39 ptg.

Tuan Kesavan a/l Subramaniam [Sungai Siput]: Terima kasih, Tuan Yang di-Pertua, Yang Berhormat Timbalan Menteri Kementerian Perpaduan Negara. Pandemik COVID-19 menghambat Malaysia ke arah satu keadaan begitu sukar yang tidak pernah berlaku dalam sejarah negara apabila krisis kesihatan dan ekonomi berlaku serentak.

Penguatkuasaan Perintah Kawalan Pergerakan (PKP) sejak Mac 2020 dengan pelbagai variasi telah merencatkan ekonomi negara. Ini kerana, apabila sektor ekonomi dan sosial ditutup sepenuhnya ataupun dihadkan, keadaan ekonomi serta perniagaan akan terjejas teruk.

Akibatnya, ramai hilang mata pencarian, dibuang kerja, perniagaan terpaksa gulung tikar, gaji dipotong separuh dan ada pula terpaksa mengambil cuti panjang tanpa gaji. Saya ingin merujuk secara spesifik kepada masyarakat India di sini. Sebelum impak pandemik COVID-19 lagi, kira-kira 57,624 atau 10 peratus daripada isi rumah kaum India Malaysia berpendapatan di bawah RM2,000 sebulan. Manakala, 71,148 atau 12 peratus daripada isi rumah kaum India Malaysia memperoleh pendapatan antara RM2,000 dengan RM3,000 sebulan dan 112,896 atau 19 peratus daripada semua isi rumah kaum India memperoleh antara RM3,000 dengan RM4,000 sebulan.

Lebih menyedihkan adalah anggaran bahawa 3,528 atau 0.6 peratus daripada isi rumah kaum India Malaysia diklasifikasikan di bawah paras kemiskinan. Saya ingin tahu apakah *blueprint* Menteri Perpaduan Negara untuk meningkatkan perlindungan kepada mereka agar tidak terus tercicir ke bawah, terutamanya dalam sektor ekonomi.

Saya juga ingin tahu, apakah *blueprint* untuk memastikan kaum India tidak keterbelakang dalam pembangunan ekonomi sendiri dan pendidikan selari dengan misi Keluarga Malaysia. Sekian, terima kasih.

2.42 ptg.

Timbalan Menteri Perpaduan Negara [Tuan Wan Ahmad Fayhsal bin Wan Ahmad Kamal]: Terima kasih, Tuan Yang di-Pertua. Terima kasih Yang Berhormat Sungai Siput atas soalan yang diberikan. Tuan Yang di-Pertua, Kementerian Perpaduan Negara telah mengambil inisiatif membangunkan Pelan Pembangunan Masyarakat India (PTMI) dengan kerjasama Universiti Sains Malaysia bagi menambah baik proses pelaksanaan program pembangunan sosioekonomi masyarakat India, khususnya yang di bawah B40.

Melalui pelan ini, lima tunjang dibangunkan secara menyeluruh bagi melaksanakan program dan tindakan mengikut jangka masa pendek, sederhana dan panjang yang menjelaskan indikator dan sasaran yang perlu dicapai iaitu;

- (i) Tunjang 1: Memperkasakan Keperluan Asas Masyarakat India;
- (ii) Tunjang 2: Meningkatkan Kemenjadian Setiap Kanak-kanak;
- (iii) Tunjang 3: Menaik Taraf Ekonomi dan Keusahawanan;
- (iv) Tunjang 4: Memperkasakan Keterangkuman Sosial; dan
- (v) Tunjang 5: Memperkasakan Wanita ke arah Kesaksamaan Gender.

Bagi memastikan terdapat penyelarasan usaha-usaha pembangunan sosioekonomi masyarakat India secara menyeluruh, kerajaan baru-baru ini telah bersetuju menubuhkan Jawatankuasa Kabinet Mengenai Pembangunan Sosioekonomi Masyarakat India yang akan dipengerusikan oleh Yang Amat Berhormat Perdana Menteri sendiri. Jawatankuasa ini akan diurusetikan oleh

Unit Perancang Ekonomi Jabatan Perdana Menteri (UPE, JPM). Sekian, terima kasih.

Dato' Ramli bin Dato' Mohd Nor [Cameron Highlands]: Ahli-ahli Yang Berhormat Mesyuarat Kamar Khas pada kali ini ditangguhkan pada jam 2.30 petang, 9 Mac 2022, esok.

[Kamar Khas ditangguhkan pada pukul 2.44 petang]